



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 11
Hunyo 7, 2006
www.philippinerevolution.org

Editorial

Silutan ang mga pasistang kriminal

*Pahayag sang Komite Sentral
Partido Komunista ng Pilipinas
Mayo 31, 2006*


Mabaskog nga ginakundenar sang Partido Komunista sang Pilipinas kag Bag-ong Hangaway sang Banwa ang wala pili, nagapadayon kag labing ginapasingki nga kampanya sang pagpamatay kag pagpanguot sa mga lider kag aktibista sang ligal nga mga demokratikong partido, organisasyong masa kag alyansa sang mga mamumugon, mangunguma, pamatan-ong estudyante, propesyunal kag iban pa nga demokratikong sahi kag sektor.

Ginatus-gatos na nga biktima, nga lunsay wala sang armas kag wala inugbato, ang brutal nga ginasalakay kag ginapatay sang mga *death squad* nga kontrolado sang mataas nga kumand kag mga yunit paniktik sang AFP kag PNP.

Ang pagpatay kay Sotero Llamas sa pihak sang lapnagon nga pagkundenar sang demokratikong upinyon publiko sa sulod kag guwa sang pungsod ang pinakaulihi nga pruweba sang lubos nga wala pagkunsiderar sa mga basehang makatawo kag sibilisado, labaw nga arogansya kag pag-abuso sa gahum, kag binuang nga pagkauhaw sa dugo sang

mga lisensyado nga manugpatay-tawo sang estado kag sang nagahari nga rehimeng Arroyo nga nagamando kag nagakontrol sa ila.

Nagapanindugan ang rebolusyonaryong hublag sa kriminal nga salabton sang pasista kag papet nga rehimeng Arroyo bilang utok, tagaplano kag tagamando sang malaot nga pag-atake sa mga wala armas nga pangontra sa pulitika. Sa sugo kag basbas ni Gloria Macapagal-Arroyo, ang nagakatabo nga pagbaha sang dugo ginplano, inorganisa kag ginadiriher sang *national security cluster* sang kabinete sa pagpamuno ni anay Gen. Eduardo Ermita kag ginalakipan sang mga panatiko nga anti-komunistang sanday Norberto Gonzales, Raul Gonzales, Avelino Cruz, Gen. Generoso Senga sang AFP kag Gen. Arturo Lomibao sang PNP.



***Mga tampok
sa isyu nga ini...***

**Mahigko nga gyera sg
rehimeng US-Arroyo**
PAHINA 3

**Kulang nga hulot-
klasehan, gagmay nga
badyet**
PAHINA 9

**3 riple naagaw,
5 suldado napatay sa
Kalinga**
PAHINA 13

Desperado nga magpabilin sa poder nga inagaw paagi sa lapnagon nga pagdinaya kag pagdispalko sa pondo pangpubliko, ginagamit sang nagahari nga rehimeng Arroyo ang hayag nga pasistang terorismo para paralisahon kag disorganisahon ang mga ligal nga demokratikong partido kag organisasyon kag iban pa nga aktibo nga nagatib-ong sang pag-pataksik sa paltik nga pangulo.

Ang mga biktima kag mga pam-ilya nila indi makalaum tubtub san-o sang hustisya halin sa pasistang pulisya kag militar, kongreso kag iban pa nga ahensya sang reaksyunaryong estado nga ginapuguran sang mga utok, tagasakdag kag tagatabon sa kampanya sang pagpamatay.

Obligasyon sang Partido Komunista sang Pilipinas kag Bag-ong Hangaway sang Banwa nga angkunon ang rebolusyonaryong hustisya para sa ila. Himuon sang Partido kag hangaway sang baya ang abot-masaranggan para pasabton sa katarungan kag silutan ang mga pasistang kriminal nga nagapadihut, nagsugo kag nagahimo sang malaut nga pagpamatay.

Nagapanawagan kami sa tanan nga biktima, mga simpatisador nila kag tanan nga nagahandum sang

tapnaon ang pagpang-atake nga mga pasista nga yara sa gahum nga maghatag sang mga impormasyon kag aktibo nga magbulig sa nagkalain-lain nga paagi agud matumod, maikahon, madakup kag masilutan ang mga pasista nga kriminal halin sa mga ginmanduan nga *triggerman* tubtub sa pinakamataas nga utok kag *controller*. Hugot nga ilikom sang Partido kag hangaway ang identidad sang tanan nga magabulig kag amligan ang ila kaluwasan.

Wala sang pasistang kapintas kag kalainan nga sarang makapahapa kag makaluhod sa pumuluyo sa mga pasista, papet kag tirano nga daku kag gamay nga nagahari-harian sa pungsod. Patimaan sang tuman nga kahadlok kag desperasyon, indi sang kusog, ang pasista nga kabuangan sang rehimen nga labaw nga ginakangil-aran sang malapad nga masa sang pumuluyo. Labi lamang nga padalumon sang pasistang hubon Arroyo ang kutkut nga ila ginatindugan kag pagalubngan.

Lubos nga yara sa


demokratikong kinamatarung sang mga ligal nga partido, organisasyong masa kag alyansa nga ipamilit kag ipakig-away ang ila lehitimo nga kinamatarung mag-organisa, magpahayag kag makigbanggi sa iban nga partido kag pwersa sa sulod sang mga regulasyon kag proseso sang reaksyunaryo nga nagaharing sistema. Paagi sa baraghal nga paglapas sa mga layi kag proseso

sang reaksyunaryong sistema mismo, labi nga ginahayag sang mga masupog nga reaksyunaryo kag pasista ang ila tunay nga kinaiya nga anti-demokratiko, antimasa kag antinasyunal. Samtang labi nga nagabuang sa pagpamatay kag pagpangtapna sa mga ligal nga organisasyon kag person-

alidad ang mga armadong gaway sang reaksyunaryong estado, dapat labi lamang nga palaparon kag pabaskugon ang paghimakas para pukanon ang pasista kag papet nga rehimeng Arroyo. Kinahanglan pur-sigido nga palaparon pa ang alyansa sang mga pwersang anti-Arroyo, pabaskugon ang mga protesta kag pangmasang paghimakas kag paigtingon ang mga kampanya kag paghimakas sa tanan nga patag para mas madasig nga tapuson ang rehimen kag ang ginapaluntad sini nga terorismo kag kadalukan.

Labaw pa sa ano man sa nagtaliwan, labi nga nagaathag nga nakita subong sang masa nga ginapigos kag ginaulipon ang hugot nga kakinahanglanon nga isulong kag pasingktion ang rebolusyonaryo nga armadong paghimakas. Solamente armado nga rebolusyon ang makapukan sa garuk nga reaksyunaryo nga sistemang malakolonyal kag malapyudal kag, sa sini, ang lubos nga solusyon sa tuman kalawig na nga krisis nga sobra-sobra na ang ginadulot nga pag-antos sa pumuluyo kag pungsod.

AB

| | |
|--|----|
|  <p>Tuig XXXVII No. 11 Hunyo 7, 2006</p> <p>Ang <i>Ang Bayan</i> ginabantala sa lengwahe nga Pilipino, Bisaya, Iloko, Hiligaynon, Waray kag Ingles.</p> <p>Mahimo ini i-download halin sa <i>Philippine Revolution Web Central</i> nga makit-an sa:</p> <p>www.philippinerevolution.org</p> <p>Nagabaton ang <i>Ang Bayan</i> sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.</p> <p>Malab-ot kami paagi sa e-mail sa: angbayan@yahoo.com</p> | |
| <h2>Kaundan</h2> | |
| Editorial | |
| Silutan ang mga pasista | 1 |
| Oplan Bantay Laya | 3 |
| Mga hari sg kabutigan | 4 |
| Pasismo sg rehimen sa Central Luzon | 6 |
| Pagpanghalit sg pasista nga estado | 7 |
| Interbensyong militar sg US | 8 |
| Garuk nga serbisyo sa edukasyon | 9 |
| Nagatimbuok nga sukot sa eskwela | 10 |
| Layi sa dugang-sweldo, ginaipit | 10 |
| Hilikuton kultural bilang armas | 11 |
| Sa luwas sa pungsod | |
| Masaker sa Iraq | 12 |
| Masaker sa Afghanistan | 12 |
| Madinalag-on nga TO | |
| Sa Kalinga | 13 |
| Sa Mindoro, Agusan kag Zamboanga | 13 |
| Sa Sorsogon | 13 |
| Balita | 14 |

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

Mahigko nga gera sang US kag sang rehimeng Arroyo

Ang serye sang pagpamatay kag pagkuot sa mga ligal nga personalidad kag pangkabilugang pagpanalakay sang rehimeng US-Arroyo sa mga pwersa sang ligal nga demokratikong hublag yabi sa subong nga ginakumpas nga *operational plan* sang Armed Forces of the Philippines-ang Oplan Bantay Laya (OBL).

Amo na lamang ang kapintas sang atake sang militar sa mga progresibo kag demokratikong pwersa nga ginapagguwa nila nga kabahin sang "pangpulitika nga imprastruktura" sang rebolusyonaryo nga armadong hublag. Halin 2001, kag ilabi na sugod 2003, todo nga ginatum-ukan ang mga ginasuspetsahan sini nga "simpatisador" sang PKP, BHB kag NDF. Partikular sa patag sang paniktik, tum-ok sang AFP ang pagtipon sang datos bahin sa mga target nga personalidad, ilabi na ang mga lider sang mga organisasyong masa kag mga alyansa nga ginatawag sang OBL bilang mga "ligal nga prente sang NDF." Matapos makatipon sang datos ginapasa ini sa mga yunit taktikal kag pangkombat nga amo ang magabalay sang mga *order of battle* (ukon listahan sang mga target nga likidahon).

Sa sini nga polisiya, indi importante sa kaaway nga tuhayon ang trato sa mga armado kag di armado ukon tago kag hayag nga organisasyon. Sistema nga kota man ang ginapatuman sang ISAFP sa mga ginapamunuan sini nga Military Intelligence Group sa likidasyon sang mga target nga personalidad.

Marka sa nagkalain-lain nga internal kag pangpubliko nga dokumento sang AFP ang amo nga mga plano. Pinakatampok diri ang isa ka dokumento nga ginatig-uluhan "Knowing the Enemy" (Pagtumod sa kaaway) nga ginapalapnag sa kubay sang mga suldado sadtong 2005. Diri ginhingadlan sang AFP bilang

mga "katuwang" sang PKP ang mga organisasyon nga pareho sang Bayan kag Bayan Muna. Gintumod nga katungdanan sang AFP nga nyutralisahan ang mga andana sang mga alyansa nga nagatuga kuno sang "kundisyon sang rebolusyon."

Halos amo man sini ang unod sang libro sang NOLCOM (Northern Luzon Command) nga ginatig-uluhan *Trinity of War 3* nga nagaserbi nga ubay para sa mga *field unit commander* sang AFP. Ginatum-ukan sini ang ideya nga para malutos ang BHB, kinahanglan lutuson man ang ginaangkon sini nga suportang masa.

Mas temprano pa, sadtong 2004, nag-isyu ang AFP sang duha ka internal nga dokumento: ang "Traget Research on Sectoral Organizations" kag ang "Institutionalizing the Conduct of Target Research as a Major Component in the Intelligence Project Preparation, in Particular, and Intelligence Cycle Process, in General". Ginasaad sang duha ka dokumento nga target sang paniktik sang militar kag pulisya

ang mga ligal nga organisasyong masa kag progresibong *party-list*.

Ang pagpamatay sang *death squad* sang AFP kopya sa mga pamaagi kag taktika sang US Special Forces nga ginatawag "*new operational arts*." Ini ang nagaserbi nga ubay sa mga sikreto nga operasyon sang mga *command unit* sang US sa nagkalain-lain nga pungsod. Diri nakasaad ang mga pamaagi kag taktika sang mga espesyal nga pwersa sang US para ipatuman ang mga sikreto nga pagpamatay kag pagkuot sa mga patriyotikong pwersa, amo man sa mga kaaway sang mga lokal nga idu-ido sini. Ang kon-

septo nga ini labi nga ginpauswag, pinondohan kag ginduso sa balayon sang 2006 Quadrennial Defense Review sang US nga nagapanawagan nga padamuon kag dugang pa nga palapnagon ang mga espesyal nga pwersa kag espesyal nga operasyon sa pagatubang sang US kag mga kaalyado sini sa "di-estado" ukon "di-tradisiyunal" nga mga pamahog.

Ang konsepto nga ini una nga nagaserbi nga operasyunal nga balayon sa likod sang Operation Phoenix, isa ka kampanya sang pasistang kakugmat nga ginlunsar sang US sa Vietnam sadtong 1967-74 kag nag-utas sang kabuhi sang mas o menos 400,000 Vietnamese. Ginapalapnag man ini sa mga operasyon sang CIA kag Pentagon sa iban pa nga bahin sang Asia; sa South kag Central America pareho sang Nicaragua, El Salvador kag Guatemala; sa Yugoslavia; kag mga bahin sang Africa. Tumampok ang



El Salvadoran Option nga bersyon sini sa panahon sang gera sibil sa El Salvador. Antes ini, ginapatuman naman sa Germany, Italy, Norway, Greece kag iban pa nga pungsod sa Europe matapos ang Ikaduha nga Gera Pangkalibutanon ang Operation Gladio. Yara sa ubod sang mga operasyon nga ini ang paniktik, pagtukod sang mga listahan sang mga pagpanilag kag paglagas kag pagtipon sang impormasyon bahin sa ginadudahan nila nga ma komunista kag simpatisador, kag paglunsar sang mga asasinasyon, pagkuot kag pagpahog sa mga ini.

Samtang regular pa nga mga tropa sang US ang nagapatuman sang Operation Phoenix, gintukod kag sinulsulan sang US ang anti-komunista nga mga grupo sa Europe kag ginkasangkapan ang mga lokal nga pwersa nga ini para papason ang mga komunista sa Europe. Sa amo man, sa El Salvador Option, indi permi nga unipormado ukon may identipikasyon, kag indi permi mga tropa sang US ang nagahimo sang pagpang-espiya, nagatumod kag nagalista sang mga target kag nagahimo sang mga asasinasyon.

Ang mga operasyon nga ini amo ang ginasunod sang Oplan Bantay Laya nga lunsay wala pili kag wala ginakilala nga mga kinamatarung. Ginagamit sini ang mga pamaagi nga hayag nga lapas sa internasyunal nga pagsulundan sa gera. Ginalauman sang Oplan Bantay Laya nga paagi sang pagbira sa mga lider kag aktibista nga hayag nga patriyotiko kag demokratikong kahublagang masa mawasak ang ginasiling pangpulitika nga imprastruktura sang rebolusyonaryong hublag. Pero magamadinalag-on lamang ini sa isa ka bagay: ang dugang nga padabdabon ang kaakig sang pumuluyo kag iduso sila sa dalan sang armadong rebolusyon.

AB



Norberto Gonzales kag Raul Gonzalez

Mga hari sang kabutigan

Kadungan sang brutal nga mga pasistang atake sang rehimeng Arroyo batuk sa pumuluyo ang pagbalay sang mga kabutigan kag maduguon nga pagpang-intriga batuk sa rebolusyonaryong hublag kag mga pwersa nga nagabato sa rehimeng Arroyo. Katuyuan sini nga takpan ang mga kriminal nga salabton sang rehimen; hatagan rason ang mga tikang nga mapiguson; samaron, tungaon kag idiskaril ang mga pwersa nga nagabato sa rehimen; kag pahinaon ang determinasyon sang pumuluyo nga nagabato.

Pinakamagahud sa kampanyang saywar sang rehimen sanday National Security Adviser Norberto Gonzales kag Justice Secretary Raul Gonzalez. Si Norberto Gonzales kag iban pa nga katapu sang Cabinet Oversight Committee on Internal Security (COC-IS) ang nagabalay sang kampanya nga ini. Si Raul Gonzalez naman amo ng nagadumala sa pagluto sang mga kaso, pagpangpresyur sa mga huwes kag pagpadihot sang mga pamaagi para tikuon ang reaksyunaryong layi agud hatagan rason ang paglagas sa mga kaaway sang rehimen.

Nagasunod sa ila kumpas ang mga tagpamaba sang Armed Forces of the Philippines (AFP) kag Philippine National Police (PNP). Anuman ang ila hambalon, ini ang sulit-suliton kag palawigon sang mga up-

isyal militar, nga magahimo sang mga ebidensya halin sa ila "*intelligence reports*" bilang "pamatuod" sa mga ginabalay nga estorya ni Gonzales.

Maduguon nga pang-intriga. Para makalikaw sa responsibilidad sini sa pagpamatay, pilit nga ginapasibangud sang rehimeng Arroyo nga ang mga ini kahimuan sang mga armadong rebolusyonaryo kag kabahin sang ginapagguwa sini nga "purgahan" sa kubay sang PKP kag BHB. Ginporma pa sini ang "Task Force Usig" agud maglunsar sang "imbestigasyon" para lamang pagguwaon wala ini sang kahalabtan sa mga pagpatay. Wala pa man sini masuguran ang imbestigasyon ginapalapta na sang PNP ang intriga nga indi kuno magnubo sa 13 sa mga ginpatay nga lider kag myem-

bro sang mga progresibong organisasyon halin sadtong 2001 ang biktima sang "pagpurga" sa kubay sang PKP kag BHB.

Ini ang ginamit nga balibad sang rehimen agud maghugas-kamot sa pagpatay kay Sotero Llamas sining karon lang. Malisyoso nga ginpasibangdan sang rehimen ang rebolusyonaryong hublag nga ginapagguwa nga akig kay Llamas, bisan nga wala naman sang natabo nga daku nga banggianay sa tunga sang rebolusyonaryong hublag kag ni Llamas. Indi kuno nila target si Llamas, siling sang Malakanyang, bangud "nagabulig siya sa gubyerno paagi sa pagka-konsultant sa sugilanon pangkalinungan." Pero si Llamas nangin konsultant sang NDFP kag indi sang gubyerno. Sa nagabalaliskad nga lohika sang Malakanyang, indi man sini mapaathag kon ngaa ang isa nga pilit sini nga ginapagguwa nga "abyan" nalakip sa 49 katawo nga ginkasuhan sini sang rebelyon kag pagkadalagang sa kudeta.

Ginapagguwa man sang AFP nga ang PKP-BHB ang utok sa pagpatay kay Noel Capulong, pangaduha nga pangkabilugang sekretaryo sang Bayan Muna sa Southern Tagalog.

Ginpangin-wala sang mga himata, kaupdanang kag kasimanwa nanday Capulong kag Llamas ang mga intriga kag kabutigan sang mga pasistang tagpamaba sang AFP. Pati ang imbestigasyon sang PNP Albay nagatudlo sa isa ka operatiba sang ISAFP sa pagpatay kay Llamas.

Tinarget man sang intriga si Romeo Sanchez, *coordinator* sang Bayan Muna sa Ilocos nga ginpatay sadtong Marso 2005. Ginlikida kuno siya sang BHB bilang kabahin sang paglagas sa mga rebisyunistang traidor, siling sang 5th ID. Kasunod sini ginbalay sang tagpamaba sang

502nd Brigade (Bde) ang kabutigan nga sanday Elena Mendiola kag Ricardo Balauag sang Bayan Muna nga ginpatay sadtong Mayo 10 sa Echague, Isabela ginluthang kuno sang BHB. Baliskad ini sa pahayag sang mga saksi nga nahitsurahan nila ang isa sa mga berdugo nga pumatay kanday Mendiola nga suldado nga nakabase sa kampo sang AFP sa Barangay Soyung, Echague.

Matapos ini, ginatungan na naman ni Norberto Gonzales ang butig nga akusasyon nahatungod sa "pagpurga" nga gin-anunsyo niya sadtong Mayo 21 nga nakitan sa tatlo ka banwa sang Bukidnon ang 18 katawo nga pinatay kuno sang BHB. Insigida nga nabuyagyag ang kabutigan ni Norberto Gonzales sang ginpanginwala ini ni Gob. Jose Ma. Zubiri kag sang mismo 403rd Bde nga amo kuno ginhalinan sang impormasyon.

"Asasinasyon kay Arroyo".

Kadungan sini, naghimo sang sugilanon ang Malakanyang bahin kuno plano nga asasinasyon kay Arroyo kag pila niya nga yabing upisyal. Agud daw matuod ini, ipaatubang tani sang AFP si Philip Limjoco, isa sa ginaakusahan nga katapu sang BHB nga ginkuot sang mga operatiba sang AFP sadtong Mayo 7. Padayon nga nagapamalibad nga ipaatubang sa publiko si Limjoco kag padayon nga tinortyur agud pwersahan magpagamit sa saywar sang rehimen.

Sa kapaslawan nga gamiton si Limjoco, ginpaatubang sang AFP sa midya ang sibilyan nga si Delfin de Guzman nga gindakup nila sa iya balay sa Norzagaray, Bulacan sadtong Mayo 11, gintago kag gintuhaw lamang makaligad ang napulo ka adlaw. Ginpagguwa nila nga siya puno sang Special Operations (SOG) sang BHB kag sekretaryo sang komiteng

prubinsya sang PKP sa Bulacan.

Ginabalay ang mga kabutigan nga ini agud idalahig ang mga pwersa nga nagabato sa rehimen. Matapos ipresentar si de Guzman, ginkuot, gintago kag tinortyur sang mga elemento sang ISAFP ang lima ka lider sang maki-Estrada nga Union of the Masses for Democracy and Justice (UMDJ). Napilitan sila na ituhaw ang mga ini matapos ang tatlo ka adlaw pero kadungan sini kinasuhan sila sang rebelyon kag ang isa sa ila, nga gintudlo kuno ni de Guzman inakusahan sang pagkadalagang sa kuno plano nga asasinasyon. Sa amo pa man, arogante nga nagabalibad ang AFP nga paatubangon sa imbestigasyon sang Senado ang mga operatiba nga naghimo sang pag-aresto kag pagtortyur. Kag pati ang pagtumod lamang sang ngalan sang mga naghimo sang mga ini ginabalibaran sang AFP.

Pagpang-ipit sa PGBI. Para makasabwag sang intriga sa kubay sang mga pwersang anti-Arroyo kag waskon ang ila paghiliusa, pilit man ginadalagang sang rehimen sang Arroyo sa mga pagpamatay sang mga aktibista kag tawong-midya si anay Sen. Gregorio "Gringo" Honasan kag ang ginapamunuan niya nga Philippine Guardians Brotherhood, Inc (PGBI).

Ginpasibangdan ni Police Director Marcelo Ele, *deputy chief* sang Task Force Usig, nga myembro kuno sang PGBI ang isa ka Rommel Lirazana. Si Lirazana isa sa mga gintumod nga suspek sa pagpatay sadtong katung-anan sang Mayo kay Alberto Orsolino, retratista sang pahayagan nga *Saksi*. Pamatuod kuno sini ang nakita nila nga *sweat shirt* sang PGBI sa mga kagamitan ni Lirazana. Gindugang pa ni Ele nga kahimuan man sang PGBI ang pagpatay kay Llamas kag madamo pa nga iba. Mabaskog nga ginahimutig sang PGBI nga myembro nila si Lirazana.

AB

Mga pasistang krimen sang rehimeng US-Arroyo sa Central Luzon

Nakahinun-anon sang *Ang Bayan* sadtong Mayo si Salud Roja, taga-pamaba sang Partido Komunista sang Pilipinas sa Central Luzon (CL), bahin sa sunud-sunod nga pagpamatay sang mga *death squad* sang rehimeng US-Arroyo sa rehiyon. Isa ang Central Luzon sa mga rehiyon nga may pinakadamu nga kaso sang mga pagpamatay kag pagpangkuot sa bilog nga pungsod.

Nagalab-ot na sa 109 ang mga kaso sang pagpamatay, napaslawan nga pagpatay kag pagkuot sa mga lider kag katapu sang mga progresibong organisasyon sa Central Luzon. Sadtong 2005 lamang, nag-abot sa 71 ang mga kaso. Halin Enero tubtub Mayo sining tuig, nagaabot na sa 37 ang biktima sang pagpamatay sa rehiyon. Tuman kasingki kag tuman kabrutal sang mga pagpamatay sa Central Luzon halin nga gintalana ini nga prayoridad nga rehiyon sang nasyunal nga pamunuan sang AFP. "Halin sa Southern Tagalog sadtong 2001-2004, ginsaylo sang AFP ang pukos sini sa Eastern Visayas kag Central Luzon halin sa ikaduha nga tunga sang 2004 tubtub subong," suno kay Ka Salud.

Labi pa nga nagsingki ang mga pasistang pag-atake sa rehiyon halin sang gindestino diri ang duha sa pinakamasupog nga pasistang berdugo: sanday Maj. Gen. Jovito Palparan sang 7th ID kag Maj. Gen. Romeo Tolentino sang Northern Luzon Command (NOLCOM).

Mayorya sa mga biktima sang rehimen mga mangunguma, "Sila ang

nagabug-os sa 62% sang mga kaso sadtong 2005, kag 83% sining una nga kwarto sang 2006," siling ni Ka Salud. May signipikanteng numero man sang mga biktima naghalin sa sahing mamumugon kag malamamugon (13%) kag mga nahanunga nga sahi (25%) sadtong 2005.

Sa bilog nga Central Luzon, prayoridad sang AFP ang mga masunod nga lugar base sa suspetsa nga sakop sang mga prenteng gerilya sang BHB ang mga ini: Hacienda Luisita sa Tarlac; nabagatnan-sidlangang bahin sang Pampanga, sa partikular ang banwa sang Mexico; sidlangan nga bahin sang Bulacan, sa partikular ang punsok sang mga banwa sang San Miguel kag San Ildefonso; kag ang erya sang Guimba-Cuyapo sa Nueva Ecija.

Ang mga lugar nga ini ginbutangan sang indi magkulang sa tig-isa ka batalyon sang mga Special Operations Team, maluwas sa CAFGU. "Indi ini pareho kadamu sang grupo sang anom ka batalyon nga gindeploy sa bilog nga Mindoro, kag walo ka batalyon sa Batangas sadtong 2002-2004. Pero sa kinaiya sang mga erya nga ginapokusan kon sa diin patag ang tereyn kag relatibo maikit kag matawo ang mga baryo, bisan isa ka batalyon lamang

nagatuga na sang mabaskog nga kahalitan sa pumuluyo," siling ni Ka Salud.

Sa napulo ka baryo sang Hacienda Luisita lamang, mas o menos isa ka batalyon na ang gindeploy sang AFP. Sa amo man, isa ka batalyon ang gindeploy sini sa 23 sa kabilugang baryo sang Mexico, Pampanga. "Sa apat ka prayoridad nga erya ginkonsentrar ang katunga sang kabilugang numero sang mga regular kag espesyal nga pwersa sang AFP nga nakatalana sa rehiyon," suno kay Ka Salud.

Indi katingalahan nga sa mga lugar nga ini pinakadaku ang numero sang mga kaso sang pagpamatay, pagkuot kag pagtortur. "Kon tipun-tipon, 90% sang kabilugang numero sang mga kaso sadtong 2005 kag 77.5% sining una nga kwarto sang 2006 ang natabo sa Nueva Ecija, Bulacan, Tarlac kag Pampanga," paathag ni Ka Salud.

Luwas diri, may yara man tatlo ka kaso sang pagpanunog, pito ka kaso sang iligal nga pagpang-aresto kag detensyon kag 223 kaso sang pagpamahug kag paghalughog sa nagkalain-lain nga baryo sa bilog nga rehiyon.

"May bastante nga ebidensya ang Partido kag BHB sa CL batuk sa mga upisyal kag yunit sang AFP kag mga *death squad* nga responsible sa mga kaso sang pagpamatay, pagkuot, pagtortur, pagpang-aresto kag detensyon. Pagabayaran sang mga ini sa takda nga panahon ang ila mga krimen sa pumuluyo," paandam ni Ka Salud.

Sa amo man may bastante nga ebidensya na ang pila ka elemento sang isa poderoso nga pamilya nga kabahin sang dalagku nga agalon nga mayduta sa Tarlac nga nakighimbunanay sa militar, pulisya kag mga bayaran nga manugpatay-tawo para sa pasistang pagpamatay. Napasaka na sa nagakaigo nga lebel sang hukmanan sang pumuluyo ang ila mga kaso.

AB

Wala untat nga pagpamatay kag pang-abuso

Wala gihapon untat ang mga paglapas sang pasistang rehimeng Arroyo sa tawhanong kinamatarung. Luwas kanday Sotero Llamas kag "Erap 5," indi magnubo sa 21 katawo ang nangin biktima sang mga armadong gaway sang pasistang estado halin Mayo tubtub una nga simana sang Hunyo.

Hunyo 4. Ginpatay sang isa ka nakabonnet nga lalaki nga armado sang M16 sanday David Costuna, 48, kag Arcadio Macale, 60, sa Barangay Balud, Borongan, Eastern Samar. Si Costuna myembro sang Bayan Muna (BM) kag si Macale isa ka lider mangunguma kag tserman sang Barangay Balud. Malapitan sila nga ginluthang samtang nagabelasyon para sa anak ni Costuna. Nagpalagyo sakay sa motorsiklo ang kriminal.

Mayo 31. Gindakup, isa ka oras kag tunga nga ginpaidalum sa interogasyon kag ginpahug nga pagapatyon sang mga elemento sang 56th IB ang tatlo ka pamatan-on nga sanday Mark, 18, Karen, 19, kag Doren, 20, sa Barangay Binagbag, Angat, Bulacan. Ang duha ka babaye ginpahug nga luguson. Gindakup sila samtang nagapagtag sang ma polyeto nga ginatig-uluhan "Handum namon kalinungan" nga nagaatake sa mga abuso militar ilabi na sang mangin hepe sang 7th ID si Maj. Gen. Jovito Palparan. Mga myembro sila sang Parish Youth Committee sang simbahan Katoliko sa kaingod nga banwa sang Norzagaray.

Mayo 29. Ginpatay sang *death squad* sang AFP si Sotero Llamas, anay lider sang PKP-BHB sa Bikol kag konsultant sang National Democratic Front sa halambalanon pangkalinungan. Si Llamas, anay man *director for political affairs* sang BM ginluthang samtang nakasakay sa iya van sa Tabacco City, Albay. Pilason man sa atake ang iya drayber.

Nagpalagyo ang mga berdugo sakay ang duha ka motorsiklo.

Mayo 28. Ginkuot sang mga elemento sang 61st IB sa Barangay Andulaan, Ilog, Negros Occidental sanday Roberto Marapo, ginaakusahan nga lider sang Larangang Gerilya 3 sa Negros kag Dionelo Borres, isa ka mangunguma nga taga-Barangay Camindangan, Sipalay City. Suno sa mga nakasaksi, pilit nga ginsakay sang apat nga armadong lalaki ang mga biktima sa isa ka duag pilak nga *van*. Nakilala ang duha sa ila nga mga operatiba paniktika sang 61st IB. Tubtub subong wala ginapakita sang militar sanday Marapo kag Borres.

Mayo 27. Ginpatay sang duha ka armadong lalaki sakay sang motorsiklo si Noel Capulong, *regional coordinator* sang Bayan-Southern Tagalog kag upisyal man sang BM. Ginluthang siya samtang naganamaho sang iya dyip sa Parian Village, Calamba City. Si Capulong ang ika-258 nga militante kag pangapat na nga makataas nga lider sang Bayan nga pinatay halin sang magpungko si Arroyo sadtong 2001.

Mayo 22-25. Iligal nga gindakup, gintago kag tinortyur sang ISAFP ang lima nga lider sang Union of the Masses for Democracy and Justice (UMJP). Ginako lamang sang AFP ang pagdakup sa ila matakpos ang duha ka adlaw. Ginsaysay sang lima sa midya ang ginbuhat sa

ila nga mga kalakasan. Suno sa ila, ginapilit sila nga hambalon sa publiko nga BHB ang nagkuot sa ila kag ginluwas lamang sila sang AFP. Ginapamilit man sang AFP nga ang isa sa ila, si Ruben Dionisio, 60-nga amo ang nag-agi sang pinakamabaskog nga tortyur-myembro sang Special Operations Group sang BHB.

Mayo 16. Pinatay sang mga elemento sang 11th IB si Peter Angkon, organisador sang Anakbayan sa Hilatain Community High School sa Guihulngan, Negros Oriental. Nagpalagyo ang duha ka kriminal sakay ang isa ka motorsiklo.

Mayo-Hunyo. Padayon ang pagpamahug kag hugot nga pagpanilag sa nagkalainlain nga kilala nga lider, organisador kag tagasuporta sang mga progresibong pwersa. Ginreport ni Danilo Ramos, pangkabilugang sekretaryo sang Kilusang Magbubukid ng Pilipinas nga isa ka pulis ang maukod nga nagasunod sa iya halin Mayo 2. Duha ka lalaki nga nakamotorsiklo ang masami man nagapanilag kay Jobert Pahilga, abugado ni Cong. Rafael Mariano sang Anakpawis kag sang mga mamumugon sa uma sa Hacienda Luisita. Sa Nueva Ecija, ginpaandaman sadtong Mayo 27-28 sang mga elemento sang 48th IB ang magamay nga pastor sang UCCP nga sanday Virgilio kag Beatriz Perido sang wala nila ginsurender ang anak ni Virgilio nga si Aprilyn, isa ka organisador sang mga imol sa syudad. Mga indi pirmado nga sulat naman ang nabaton nanday Fr. Renato Respicio sang Iglesia Independiente sa Sto. Domingo, Nueva Ecija kag sekretarya niya nga si Angelina Hasa nga nagasiling untaton na nila ang pagorganisa sa pumuluyo kon gusto maglawig ang ila kabuhi.

Pagpasingki sang armadong pagpasilabot sang US sa Pilipinas

Dapat aktibo nga pamatukan sang pumuluyong Pilipino ang kasug-tanan nga magtukod sang Security Engagement Board (SEB). Ang ka-sugtanan nga ginlagdaan sang gubyernong US kag rehimeng Arroyo sadtong Mayo 24 isa ka panibag-o na naman nga paglapak sa pungsodnon nga soberanya sang Pilipinas. Nagatuga ini sang dugang nga paglapad sang armadong pagpasilabot sang US sa pungsod kag labi pa sini himuon nga daw daku nga base militar sang US ang bilog nga Pilipinas.

Ang SEB isa ka konsultatibong grupo nga ginapamunuan sang Chief of Staff sang Armed Forces of the Philippines (AFP) kag Commander sang US Pacific Command nga mag-adumala sa "buligay pangseguridad" sang US kag Pilipinas sandig sa gin-palapad nga depinisyon sini. Halin sa anay "tradisyunal" na mga ha-lambalanon pangseguridad nga na-hanungod sa mga eksternal nga pamahug militar nga ginasakop sang Mutual Defense Treaty (MDT) sang 1956, pagasakupon na sang bag-o nga kasugtanan pati ang "in-di tradisyunal" nga mga pamahog pareho sang terorismo, pagnegosyo

sang droga, pimirata kag mga kalamidad pareho sang baha, bagyo, linog kag epidemya.


Gulpe nga nagsulod ang mga bag-o nga depinisyon kag halambalanon sini matapos imandu sang US Department of Defense ang pagsan-to sang mga kasugtanan pangse-guridad sang US kag mga papet nga estado sini sa bag-ong pangkalibu-tanon nga estratehiya militar sang US nga nakasaad sa 2006 Quadren-nial Defense Review (QDR). Suno sa QDR, mas daku subong nga tum-ok ang ginahatag sang mga pwersang militar sang US sa "gera batuk sa terorismo kag mga iregu-lar nga aktibidad sa pagpakig-gera, lakip

ang madugayan nga di kumbensyu-nal nga pagpakig-away, kontra-terorismo, kontra-rebolusyon kag suportang militar para sa pagpalig-on kag rekonstruksyon."

Sa pagdugang sang mga "di-tradisyunal nga halambalanon," nga kadam-an wala direkta nga kaang-tanan sa seguridad ukon halambalanon militar, ginkuha na ang tanan nga posibleng sablag sa pagsulod kag operasyon sang mga tropa pangkombat sang US sa ano man nga bahin sang teritoryo sang Pilip-inas. Sa subong labi pa nga mapalapad kag mapasingki ang pagpasilabot-militar sang US sa pungsod kag mas mabatuan ang rebolusy-onaryong paghimakas para sa pung-sodnon nga pagpahilway kag demokrasya kag iban pa nga anti-imperyalistang paghimakas sa nagkalain-lain nga pungsod, nga pangunahon ginatum-ukan sang QDR.

Sikreto nga ginpaspasan sang US kag sang papet sini ang bag-o nga kasugtanan kag ang pagtukod sang magadumala sini nga SEB likom sa ihibalo sang Senado kag sang publiko. Gin-anunsyo na lamang ini pagkatapos matukod. Gi-narason sang Malakanyang nga sug-pon lamang ini sa Mutual Defense Treaty kag indi ini bag-o nga kasug-tanan nga kinahanglan aprubahan sang Senado. Sa subong, gi-nalikawan sang rehimen ang pro-bisyon sa konstitusyon sang reaksyunaryong estado nga naga-obligar repasuhon kag ratipikahon anay sang Senado ang mga inter-nasyunal nga tratado kag kasug-tanan antes mag-epekto ang mga ini.

Ang SEB ang pinakaulihi lamang sa mga instrumento sang US halin sadtong katung-anan sang dekada 1990 para mapahalag ang interben-syon militar sini sa pungsod. Gina-bangdanan ang Abu Sayyaf sadtong dekada 1990 agud liwat makapasu-lod sa pungsod sang mga tropa



pangkombat sang US sa balayon kuno sang MDT kag sang Visiting Forces Agreement. Ini bisan internal nga halambalanon pa gihapon ang Abu Sayyaf bangud isa lamang ini ka bandido nga grupo nga naghimo sang *kidnap for ransom* sa Mindanao. Kuno abi nagahatag lamang ang mga pwersa sang US sang mga paghanas kag abiso sa mga tropang Pilipino kag nagahatag sang "*humanitarian assistance*" sa pumuluyo sa mga lugar nga sakup sang Abu Sayyaf. Pero ang matuod nga nagapartisipar man sila sa mga operasyong pangkombat.

Halin sadto nagapasulod man sila sang mga armadong pwersa sang US kon sa diin wala sang patud nga "tradisyunal" nga pamahog sa seguridad kag ang gamit nga komoplahe amo ang "*joint military exercises*" kag "*humanitarian mission*." Luwas sa mga erya sang Abu Sayyaf, ginsakup man sang mga tropang Amerikano ang mga ginadudahan nga prenteng gerilya sang BHB. Ginbangdanan sang rehimen kag sang US sadtong ulihi nga kwarto sang 2004 ang kinahanglanon nga bulig sang mga nahalitan sang pagtiphag sang duta kag sang duha ka dalagku nga bagyo sa Aurora kag sa naaminhang Quezon kag sining Pebrero 2006 sa Southern Leyte. Kuno abi nagoperasyon sibiko pero sa aktwal nagapaniktik, nagmapa kag nagpamiliyaris sila sa lugar kag nagpasa sang datos paniktik kag abiso militar sa mga pwersa sang AFP nga nagalunsar sang mga operasyon militar batuk sa mga rebolusyonaryong pwersa didto.

Ang pagkatukod sang SEB ang senyas sang labing pagsingki sang armadong ingterbensyon sang US sa Pilipinas labi na sa atubang sang kapaslawan sang rehimeng Arroyo nga tapnaon ang padayon nga pagbaskog sang rebolusyonaryo nga armadong paghimakas. **AB**



Serbisyo sang inutil nga rehimen

Kulang nga hulot-klasehan, gagmay nga badyet

Tuig-tuig, ginaantos sang mga bumulutho ang pabug-at nga pabug-at nga mga problema nga indi malubad sang rehimen. Ginalukdo nila ang mataas nga mga balayran, kakulangan sang mga klasrum, manunudlo, libro kag mga pasilidad. Sa atubang sang mga ini, may gana pa nga ipabugal sang rehimen nga nalubad na ang pila ka problema, pareho sang kakulangan sa mga hulot-klasehan.

Kulang katama nga mga hulot-klasehan. Sa atubang sang midya, kinastigo ni Gloria Arroyo sining Mayo 30 si Acting Department of Education (DepEd) Sec. Fe Hidalgo sa isa ka pulong sang kabinete. Ang kabangdanan, ginkaakig ni Arroyo ang pagreport ni Secretary Hidalgo nga 6, 832 ang kulang nga hulot-klasehan. Suno kay Hidalgo, nakabase ang iya report sa istandard nga 45 estudyante sa kada isa ka klasrum. Madugay na nga istandard sa papel sang DepEd kag sang daan nga Department of Education, Culture and Sports ang tumbasan nga 45:1.

Gilayon nga binara ni Arroyo si Hidalgo sa pagsiling nga sala ang datos sini. Suno kay Arroyo, nagisa na sila ni Hidalgo nga remedyuhan ang problema sa klasrum

pakadto sa 100 paagi sa *double-shifts* (buot silingon, duha ka klase ang magagamit sa isa ka hulot-klasehan sang tig-tunga sa adlaw). Sa pagdasok ni Arroyo sa mga estudyante sa mga klasrum, maabot na lamang kuno sa 1,000 ang kulang.

Bangud sa pagkastigo sa iya ni Arroyo, pagkahapon gilayon nga ginbawi ni Hidalgo ang nauna niya nga pahayag sa midya kag ginhambal nga wala na sang kakulangan sa mga hulot-klasehan.

Pero suno kay anay DepEd Usec. Juan Miguel Luz, ang aktwal nga kakulangan sa klasrum amo ang 74,115, base sa istandard nga 45 estudyante sa kada isa ka klasrum (*single-shift* ukon isa ka klase sa bilog nga adlaw). Suno kay Luz, ang datos ni Hidalgo nga 6,832 ku-

lang nga hulot-klasehan nakabase na sa areglo nga duha ka klase nga tig-50 estudyante sa bilog nga adlaw.

Luwas sa kakulangan sang mga hulot-klasehan, madamo man ang mga klasrum nga gubaon na kag peligroso nga gamiton. Suno sa Third Elementary Education Project (TEEP) sang DepEd, 6,098 lamang sang 55,778 klarum sa 23 prubinsya sadtong 1999 ang yara sa maayo nga kahimtangan kag 7,098 sa mga gubaon nga klasrum ang indi na pwede kumpunihon. Nagaabot lamang sa 14,184 ang nakumpunir sa kabilugan nga 42,582 klasrum nga dapat kumpunihon paglab-ot sang Hunyo 2005.

Gagmay nga badyet para sa edukasyon. Nagbahin lamang ang rehimen sang P119.1 bilyon para sa DepEd sa pungsodnon nga badyet subong nga tuig. Mas daku kuno ini sang P7.1 bilyon kumparar sadtong 2005. Pero ang matuod, nagnubo sang 27.9% ang bahin sang edukasyon sa badyet sadtong 2005 ikumparar sadtong 2004.

Ginapabugal ni Budget Sec. Rolando Andaya Jr. nga magabahin kuno ang gubyrno subong nga tuig

Nagatimbuok nga mga balayran sa eskwela

Nubenta'y siyete sa 270 nga pribadong kolehiyo kag unibersidad sa Metro Manila ang nagtaas sang matrikula kag iban pa nga balayran para sa kolehiyo subong nga pagbukas klase. Samtang, nagaabot sa 52 hayskul ang nagtaas sang matrikula sang 10% sa Manila, Quezon City kag sa iban pa nga syudad sang Kamaynilaan.

Sa Bikol, 24 nga kolehiyo kag unibersidad ang gintugutan magtaas sang matrikula sa abereyds nga 13.7% ukon P44.70 kada yunit. Sa Caraga Region naman, 34 sa 53 nga kolehiyo sa apat nga prubinsya sini ang nagtaas sang matrikula sa minimum nga 7.6%. Sa Baguio City, pito sa 14 nga kolehiyo kag unibersidad ang nagtaas sang mga balayran. Nagaabot sa 458 ukon 32% sang kabilugan nga 1,465 pribadong kolehiyo ang nag-aplay para magtaas sang matrikula subong nga tuig.

Suno sa Commission on Higher Education (CHED), ginatugutan magpasaka sang matrikula nga wala konsultasyon ang mga eskwelahan nga indi maglampas sa upisyal nga datos sa implasyon, nga sa subong 7.6%. Sa aktwal, lisensya lamang ini sa mga eskwelahan nga magtaas sang matrikula kada tuig. Sa taas sang ila kita, indi mag-nubo sa walo nga pribadong eskwelahan ang kalakip sa Top 1,000 Corporations sa Pilipinas. Ini ang Centro Escolar University, Mapua Institute of Technology, Far Eastern University, University of the East, Philippine Maritime Institute, Technological Institute of the Philippines, AMA Computer University kag STI College. AB

sang P17 bilyon para sa mga bag-o nga klasrum kag manunudlo sa pangpubliko nga mga eskwelahan. Pinakadaku kuno ini nga alokasyon sa sulod sang pila ka tuig. Pero kon

lantawon kon diin nakatalana ang prayoridad sang gubyrno sa P1.05 trilyon nga pungsodnon nga badyet para sa 2006, nagalagting nga P723 bilyon ang awtomatiko nga alokasyon para sa bayad-utang.

Suno sa TEEP, nagabalor sang P442,800 ang pagpaobra sang isa ka klasrum nga may 63 metro kwadrado nga salog, pintado, may kisame kag linya sang tubig kag kuryente. Kon ini ang himuon nga basehan sa paghimo sang kulang nga 74,115 nga hulot-klasehan, magaguwa nga nagakinahanglan sang P32.08 bilyon-nga tuman ka gamay kumparar sa P723 bilyon nga pangbayad sang utang sang pungsod.

Nagalab-ot lamang sa 2.4% sang GDP (*gross domestic product*) ang ginabahin sang gubyrno para sa edukasyon ikumparar sa 4.41% nga ginabahin sang iban nga pungsod nga kapareho sa Pilipinas ang lebel sang kauswagan, suno sa United Nations. AB

Layi sa dugang-sweldo, gin-ipit

Ginsabotahe sang maki-Arroyo nga liderato sang Kongreso ang ginasaligan tani nga pagpasar sang hagna nga layi sa P125 dugang nga sweldo paagi sa pag-atrasar sa pag-imprenta sini agud indi na ini makalagas sa ikaduha nga pagbasa antes magsara ang Kongreso sining Hunyo 7.

Sa amo man, wala pa man lubos naipasar sa Kongreso nagpaandam na ang Malakanyang nga indi sini pagsuportahan ang hagna nga layi bisan pinalabnaw na ini. Suno sa ginaproponer, igahatag sang hulugan ang dugang nga sweldo sa sulod sang tatlo ka tuig. Ginpamilit man sang Malakanyang nga ipaagi ang anuman nga desisyon nahanungod sa umento sa mga kontra-mamumugon nga *regional wage board*.

Kon usisaon, mabaton man sang mga mamumugon sang bilog ang P125 dugang nga sweldo, nga padayon ginahikaw sa ila, kulang nga kulang gihapon ini. Suno mismo sa mga ahensya sang gubyrno, sa Metro Manila P640 na ang kinahanglanon nga minimum nga adlawan nga kita sang isa ka anum-katawong pamilya para mabuhì sang disente. AB

Pangkultura nga palaguwaon: Epektibo nga armas sa kampanyang masa

Epektibo nga armas sa pagpasulong sang rebolusyon ang arte kag literatura. Liwat napamatud-an sini sa isa ka kampanya antipiyudal nga ginlunsar sang BHB kag isa ka grupo pangkultura nga nagahulag sa isa ka prenteng gerilya sa Bikol sadtong 2003.

Madinalag-on kag sistematiko nga inaplikar sa lugar ang mauswag kag santo nga oryentasyon sang hilikuton pangkultura sa isa ka kampanya para sa pagpanubo sang porsyento sang *resiko** sa produkto sang masang manuglubi sa erya.

Breyktru man ini sa paggamit sang nagkalain-lain nga porma sang arte kag palaguwaon agud papagsikon ang kampanyang masa. Nag-angkon man sang buhi nga eksperensya ang grupo kag yunit sang BHB sa pagtukod kag pagpaandar sang mga grupo pangkultura sa lokalidad.


Bilang sabat sa demanda nga pangpropaganda sang kampanya, ginlakip sa plano ang mga palaguwaon sa rali kag *vigil* nga matabo sa adlaw sang kumprontasyon sa komersyante. Bilang paghanda, naghimo sang isa ka kanta ang grupo katuwang ang BHB-ang "Resikada" nga nagkuha sang tono halin sa isa mga pinakabantog nga kanta sadto sa radyo, ang "Spaghetti Song."

Nagtipun-tipon ang mga pamatan-on nga myembro sang grupo sa isa sa pinakakonsolidado nga baryo nga sakop sang kampanya. Nanguna ang grupo sa pagtudlo sang kanta kag saot nga igapresentar nila sa rali. Sa bulig sang pila nga kaupod sa BHB amat-amat nga nahanas ang mga myembro sang grupo sa pagpaminsar sang mga matinugahon nga pamaagi agud papagsikon ang kampanyang masa. Nangin tampok ang pagpagguwa sang mga pamatan-on sa una nga rali nga natabo sa temprano nga bahin sang Septyembre 2003. Nad-

umduman gid ini sang masang mangunguma, kag pati sang masmidya nga nagkober sa kampanya.

Sa una nga pagkasa wala gilayon magpasugot ang komersyante sa gina-insister sang mga manuglubi nga panubuo ang porsyento sang *resiko* halin sa masobra 25% pakadto 15%. Bunga sini, binoykot sang masa ang komersyante. Ginplano man nila ang ikaduha nga ralikumprontasyon. Luwas sa pamatan-on, may pila pa nga mga indibidwal halin sa lugar ang nagboluntaryo magpresentar diri. Ginbuligan man sang grupo kag Hangaway ang pila ka pamatan-on sa pagkanta sang mga ambahanon pangmangunguma kag pagtula sang "Kung Tuyo na ang Luha mo, Aking Bayan" nga ginsulat ni Amado V. Hernandez.**

Nagmadinalag-on ang mga manuglubi sa ikaduha nga kumprontasyon kag napirmahan ang kasugtanan sa pagpanubo sang *resiko*. Kadungan sa hugong nga dulot sang kadalag-an sa kampanya ang mapagsik nga hugong nga ginapakita sa mga palaguwaon sang mga pamatan-on kag indibidwal sa lugar. Halin sa ekspserensya nga ini, mas nangin maathag sa grupo kag BHB ang papel sang arte sa pagpasulong



sang mga rebolusyonaryong hilikuton sa kaumhan.

Nakapaserbi ini sa pagpapagsik sang iba pa nga mga kampanyang masa. Halin sa mga inagihan nga ini, napamatud-an ang pagka-epektibo sang santo nga transpormasyon sang mga popular nga porma sang arte kag pag-adaptar sa mga ini sang progresibo kag rebolusyonaryo nga kaundan. Liwat man napopularisa ang mga klasiko nga progresibo kag rebolusyonaryo nga ambahanon kag sinulatan, pareho sang mga martsa kag kundiman halin sa album nga *Mga Kanta ng Rebolusyong Pilipino* kag mga himo sang mga kilala nga mamalaybay nga sanday Amado V. Hernandez kag Carlos Bulosan.***

Nagserbi nga tungtungan sa pagpalapnag sang santo nga oryentasyon sang pangkultura nga hilikuton sa kaumhan ang mga leksyon nga nakuha sa nasambit nga kampanya. AB

* Ang *resiko* amo ang porsyento nga arbitrario nga ginakuha sang komersyante sa presyo sang kopra bangud ang moisture content kuno sini mas mataas sa istandard nga 12%.

** Si Amado V. Hernandez (1903-1970) isa ka makabanwa nga lider-obrero kag premyado nga mamalaybay, nobelista kag peryodista.

*** Si Carlos Bulosan (1913-1956), mamalaybay, estoryador kag organisador sang mga unyon sa mga plantasyon sa US, kaupod sa una nga grupo sang mga migrante nga Pilipino nga nagpasimpalad sa US sadtong dekada 1920 tubtub 1950. Nangin katapu siya sang Communist Party of the USA.



24 sibilyan nga Iraqi, minasaker sang US Marines

Baynte'y kwatro nga sibilyan nga Iraqi ang minasaker sang 12 katawo nga tropa sang US Marines kag mga suldado nga Iraqi sa syudad sang Hidatha sadtong Nobyembre 19, 2005. Gintakpan ini sang masobra apat ka bulan. Pero bunga sang pagpursiger sang mga grupo nga nagatib-ong sang tawhanong kinamatarung nabuyagyag ini sa internasyunal nga midya.

Ang masaker reaksyon sang mga nagapatrulya nga elemento sang US Marines matapos iguon kag waskon sang isa ka bomba nga nakalatag sa higad sang karsada ang ila salakyan nga Humvee nga nagresulta sa pagkamatay sang isa ka suldado nga Amerikano. Masunod nga adlaw, gin-report sang US Marines sa publiko nga isa ka suldado nga Amerikano kag 15 sibilyan ang naigo kuno sang bomba kag namatay. Luwas diri, walo ka rebelde nga Iraqi man kuno ang napatay sa natabo nga inaway matapos ang pagpangbomba.

Nabuyagyag lamang ang kamatuoran sadtong Enero 2006 sang padalhan sang isa ka estudyante nga Iraqi sang isa ka bidyo ang isa ka grupo nga nagatib-ong sang tawhanong kinamatarung sa Iraq

kag ginpadala ini sang nasambit nga grupo sa *Time Magazine*. Ginapakita sa bidyo ang mga biktima sa morge kag ang itsura sang mga balay nga natabuan sang masaker. Maathag na ang mga biktima ginpangluthang sa kaugalingon nila nga mga balay kag indi namatay sa pagpangbomba ukon sa inaway. Una amo nga gintuyo ini nga tabunan sang mga upisyal sang US sa pagsiling nga propaganda lamang ini sang al Qaeda. Ugaling sang ulihi napilitan man sila nga maglunsar sang imbestigasyon.

Suno sa isa ka artikulo sa *Time Magazine* sining Marso, ginsaysay sang mga sibilyan nga nakaluwas sa masaker kon paano nagwalas ang mga suldado nga Amerikano pagkamatay sang ila kaupdanan. Siling nila, ginpangluthang sang mga sulda-

do ang mga pasahero sang kalapit nga taksi kon sa diin apat nga estudyante nga Iraqi ang napatay, luwas sa drayber sang taksi. Pagkatapos ginsulod kag hinalughog sang mga suldado ang tatlo ka balay na malapit sa natabuan sang pagbomba kag isa-isa nga ginluthang ang mga nagaestar diri, upod ang isa ka grupo sang mga bata halin isa tub-tub anum ka tuig ang pang-edaron, isa ka babaye nga 65 anyos kag isa ka lalaki nga halos 80 anyos na nga yara sa *wheelchair*. Matapos ini magguwa sa *Time*, wala sang nahimo ang militar sang US kundi akuon ang ginatawag Haditha Massacre.

Bunga sini, sinuspinder ang mga *battalion* kag *company commander* nga imbolbado nga yunit kag kinasuhan sang marder kag pagpangtiko sang mga report ang bilog nga iskward sang US Marines. Pero wala sang silut nga ginpanaog sa mas mataas pa nga upisyal militar sang US nga amo ang nagmando nga tabunan ang mga matuod nga hitabo. Samtang. Nabuyagyag man ang duha pa nga insidente sang pagpamatay sang mga suldado nga Amerikano sa mga sibilyan nga Iraqi. Pinakaulihi diri ang pagpatay sadtong Mayo 27 sa duha ka babaying Iraqi, lakip ang isa ka mabdos nga malapit magbun-ag. Ginpangluthang ang ila salakyan sang indi ini gilayon nakapundo sa isa ka tsekpoynt sa syudad sang Samarra bangud sa pagdali-dali nila nga makalab-ot sa ospital para makabun-ag ang nagamabdos nga babaye.

Bago ini, 11 sibilyan lakip ang lima ka pamatan-on kag apat nga babayi ang ginpangluthang sadtong Marso sang mga elemento sang US Marines sa banwa sang Ishaqi. Pagkatapos sini ginbomba sang mga suldado nga Amerikano ang bilding nga nahamtangan sang mga biktima. AB

80 Afghani, pinatay sang mga suldado nga Amerikano

Indi magnubo sa 80 sibilyan nga Afghani ang nabalita nga napatay sang mga suldado nga Amerikano sining Mayo 29.

Mga trenta nga sibilyan ang napatay sang pangluthangon sang mga mapanakop nga pwersa sang US ang ginatus-gatos nga demonstrador sa syudad sang Kabul, kabisera sang Afghanistan. Ginapakita sang mga retrato nga kuha sang istasyong Al Jazeera ang pagpangtiro sang mga suldado nga Amerikano sa mga sibilyan nga nagapangbato sa mga *armored personnel carrier* (APC) sang US bilang protesta sa pagpanakop sang mga Amerikano sa ila pungsod.

Sa nabagatnan nga bahin sang Afghanistan, ginareport man nga indi magnubo sa 50 katawo ang namatay sang bombahon sang mga eroplano sang US ang isa ka moske sa prubinsya sang Helmand. AB



3 riple naagaw, 5 suldado napatay sa Kalinga

Lima ka suldado ang napatay kag lapat nga iban pa ang napilasan sa tatlo ka taktikal nga opensiba nga ginlunsar sining ulihi nga simana sang Mayo sang mga Pulang hangaway sang Leo Cawilan Command sang Bag-ong Hangaway sang Banwa (LCC-BHB) sa Kalinga.

Tatlo ka elemento sang Charlie Coy sang 21st IB ang napatay sang lambatan sila sadtong aga sang Mayo 28 sa Sityo Supac, Barangay Daoangan, Balbalan. Wala sang anumang kaswalti sa bahin sang mga hangaway. Suno kay Tipon Gil-ayab, tagapamaba sang LCC, naagaw sa ambus nga ini ang duha ka M16, isa ka M203 *grenade launcher*, dula ka *rifle grenade*, 12 granada nga 40 mm kag ginatus-gatos nga bala.

Sadtong aga man nga ina, naglunsar sang operasyong harasment ang isa pa nga yunit sang LCC batuk sa detatsment sang Philippine Army kag CAFGU sa Barangay Taga, Pinukpuk. Duha ka suldado ang napa-

atay kag apat pa ang napilasan, lakip ang duha ka elemento sang CAFGU.

Antes ini, ginsunog sang mga Pulang hangaway sadtong Mayo 25 ang isa pa nga detatsment sang mil-

itar sa Aguinaldo Hill, Barangay Asibanglan, Pinukpuk nga inabandonar sang mga suldado nga kinulbaan sa sunud-sunod nga mga pagpangatake sang BHB kag sa kawad-on sang suporta sa mga tagabaryo. **AB**

Mga aksyong militar sa Mindoro, Agusan kag Zamboanga

Nag-angkon sang lima ka kaswalti ang AFP sa tatlo ka separado nga aksyong militar sang BHB sa Zamboanga del Sur, Occidental Mindoro kag Agusan del Sur halin Mayo 25 tubtub Hunyo 2. Isa ka baril ang naagaw sang mga gerilya.

Sa Zamboanga del Sur, isa ka suldado sang 53rd IB ang ginlambatan sang BHB sa Barangay Lukoan, Lakewood sadtong Hunyo 2. Napatay ang suldado kag naagaw ang iya armas.

Sa Occidental Mindoro, isa ka suldado kag duha ka elemento sang CAFGU ang napilasan sang salakayon sang BHB ang detatsment sang 8th IB sa Barangay Casague, Sta. Cruz sadtong gab-i sang Mayo 28.

Sa Agusan del Sur, isa ka elemento sang CFGU ang napatay sa operasyong harasment sang BHB batuk sa detatsment sang 23rd IB-CAFGU sa Barangay New Tubigon, Sibagat sadtong Mayo 25. **AB**

Mga armadong aksyon sang BHB sa Sorsogon

Sunud-sunod nga kahalitan ang gin-angkon sang mga Stropa sang AFP bunga sang nagkalain-lain nga aksyong militar nga ginlunsar sang Celso Minguez Command sang Bag-ong Hangaway sang Banwa (BHB) sa Sorsogon sadtong Mayo 15-19. Anum nga pwersa sang kaaway, lakip ang isa ka *hitman* sang *death squad* sang AFP, ang napatay kag indi magnubo sa 11 ang napilasan sa ila sa mga aksyong aksyon nga ini.

Suno sa isa ka pahayag halin kay Ka Jose Buenaobra, tagapamaba sang Romulo Jallores Command sang BHB-Bikol, isa ka operasyong partisano, isa ka operasyong isnayp, anum nga harasment kag isa ka maniobra kontra-reyd ang ginlunsar sang BHB-Sorsogon sadtong mga adlaw nga ina.

Pinakamadamo nga kaswalti ang gin-angkon sang kaaway sadtong Mayo 17 sang madinalag-on nga napangibabawan sang isa ka apat-katawo nga tim sang BHB ang tuyo nga reyd sa ila sang 15 elemento sang Philippine Army sa Barangay Busay, Magallanes.

Nakibot ang mga nagaatake nga militar sang paluk-

pan sila sang *land mine* kag pagtargeton sang mga gerilya. Lima ang napatay kag duha ang napilasan sa kubay sang kaaway. Walo pa nga suldado ang napilasan sa apat nga operasyong harasment sang BHB sadtong adlaw man nga ina sa mga banwa sang Magallanes, Bulan kag Gubat.

Samtang, isa ka suldado ang napilasan sang isnaypingon sang isa ka tim sang mga gerilya ang 14-katawo nga tropa sang kaaway sa Barangay Juan Daan, Bulan sadtong Mayo 18. Taranta nga nangluthang sa nagkalain-lain nga direksyon ang kaaway. Isa ka sibilyan ang naigo sa wala direksyon nila pagpalupok.

Sadtong Mayo 15, ginsilutan man sang BHB sa sentro sang banwa sang Irosin si Domingo Habla, isa ka pangunahong hitman sang death squad sang AFP. Sining sang Romulo Jallores Command, daku nga tikang ang pagsilut nga ini sa pag-angkon sang rebolusyonaryong hustisiya para sa mga ginpatay nga aktibistang masa kag mga myembro sang mga progresibong organisasyon. **AB**

Negosasyon sang PCGG sa kinawat nga manggad ni Marcos

NAGAANI sang mabaskog nga kundenasyon ang Presidential Commission on Good Government (PCGG) sa ginahimo sini nga pagpakig-areglo sa pamilya Marcos para tulungaon ang kinawatan nga manggad sang anay diktador.

Kaangot sini, ginpasaka sa Kongreso ni Bayan Muna Rep. Satur Ocampo kag lima nga iba pa nga progresibong mamalidha ang House Bill No. 1264 nga nagatuyo nga imbestigahan ang napabalita nga aregluhan kag igadumili ang pagbasura sa mga kaso nga kriminal batuk sa mga myembro sang pamilya Marcos bilang kabahin sang "rekonsilyasyon".

Nahayag sa publiko ang ginaluto nga aregluhan sang makuhaan sang bidyo kag retrato si PCGG Chairman Ricardo Abcede nga nakigbayle kay Imelda Marcos sa isa ka kasadyahan. Gin-ako ni Abcede nga gin-imbihan niya ang balo ni Marcos sa iya *birthday party* bangud kabahin kuno ini sang pagtinguha para sa rekonsilyasyon.

Sa ginaluto nga aregluhan, \$5 bilyon tubtub \$10 bilyon nga bahin sang ginkawat nga manggad ang magakadto sa gubyernong Arroyo, kabaylo sang mas daku nga kantidad nga igauli sa pamilya Marcos kag pagbasura sa tanan nga mga kaso kontra sa ila.

Padihut nga cha-cha, nalugaw-an

BUNGA sang pursigido nga pagtinguha sang mga pwersa nga anti-Arroyo nga batuan ang kada padihut kag tikang sang rehimeng Arroyo para paspasan ang cha-cha, napaslawan ang tanan nga pagtinguha sang Malakanyang nga masuguran na ang pag-amyenda sang konstitusyon antes ang liwat nga pagbukas sang Kongreso kag Senado sa Hulyo 24. Sa amo pa man, ginpabutyag ni Press Sec. Ignacio Bunye sining Hunyo 5 nga padayunon gihapon nila ini sa masunod nga tuig. Ginpabutyag man niya ang handum nga ang eleksyon sa 2007 amo ang para pa sa bag-o nga unikameral (nagaisa nga kapulungan) nga parlamento.

Ang pag-atras sa padihut nga cha-cha resulta sang kapaslawan sang mga maki-Arroyo nga kongresista nga kumbinsihon ang mga senador nga itransporma ang gintingub nga kapulungan sang Kongreso kag Senado padulong sa isa ka *constituent assembly*. Plano sang rehimen nga paserbihon ang kapulungan nga ini bilang behikulo sa pagbag-o sang konstitusyon. Antes ini, sunud-sunod man nga kapaslawan kag bara sa pagpasulong sang cha-cha paagi sa paltik nga "people's initiative" nga ginapadihut sang Malakanyang.

Ginahingabot tani sang Malakanyang ang Mayo 25 nga dedlayn para matuman ang ginatakda sang reaksyunaryo nga layi nga 60 adlaw nga pagtalakay sa anuman nga halambalanon antes ini ibutang sa plebisito. Ginalauman sang rehimen nga makahiwat na sang plebisito paglabot sang Hulyo para sa isa ka bag-o nga parlamento nga unikameral na lamang ang magabukas sa baylo nga separado nga Kongreso kag Senado. Nakulbaan ang Malakanyang nga kon wala nadayon ang cha-cha antes ang Hulyo 24, posible nga mabudlayan na ini nga kontrolon ang mga mahimo matabo pagkatapos sini, pareho sang panibag-o nga *impeachment* kag pagbaskog kag pag-abante sang oposisyon sa eleksyon sa 2007.

Batasan 6, padayon nga ginaipit

PADAYON ang pagtum-ok sang rehimeng Arroyo sa "Batasan 6." Nagmadinalag-on si DOJ Sec. Raul Gonzalez nga mapaatras ang orihinal nga huwes nga may kapot sang kaso. Ginpasa ang kaso kay Judge Encarnacion Moya sang Makati Regional Trial Court nga pabor sa rehimeng Arroyo.

Gilayon nga gindeklarar ni Moya nga may basehan kuno ang kasong rebelyon batuk kay Rep. Crispin Beltran. Maathag nga ginalatag na sang rehimen ang senaryo para mahusgahan nga nagkasala sang rebelyon ang "Batasan 6" kag ipiton sila kag ang mga partido nga ila ginatiglawas.

Pagpanuhol batuk sa *impeachment*

BANGUD napaslawan ang Malakanyang nga ilagas ang cha-cha sa Hulyo, posible nga madayon ang panibag-o nga *impeachment* batuk kay Gloria Arroyo. Nagakadasma subong ang rehimen nga baklon ang lealtad sang mga kongresista para indi nila suportahan ini. Nabuyagyag sining Hunyo 5 nga magabaton ang mga maki-Arroyo nga kongresista sang dugang nga P7 milyon, luwas pa sa tig-P70 milyon nila nga "pork barrel" nga nakasaad sa nasyunal nga badyet sang 2006. Sa pihak nga bahin, maaga anay sa buho sang dagum ang mga pagapabor sa *impeachment* antes nila makuha ang ila "pork barrel".

Suno kay Rep. Rolex Suplico, isa sa mga bumuto para sa *impeachment* sadtong 2005, ang mga oposisyunista nakabaton lamang sadto sang 50% sang P70 milyon nga "pork barrel" na nakuha sang mga maki-Arroyo. Ang iban, pareho sang mga tiglawas sang Bayan Muna wala halos sang nakuha.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 11
Hunyo 7, 2006
www.philippinerevolution.org

Editorial

Silutan ang mga pasistang kriminal

*Pahayag sang Komite Sentral
Partido Komunista ng Pilipinas
Mayo 31, 2006*


Mabaskog nga ginakundenar sang Partido Komunista sang Pilipinas kag Bag-ong Hangaway sang Banwa ang wala pili, nagapadayon kag labing ginapasingki nga kampanya sang pagpamatay kag pagpangkuot sa mga lider kag aktibista sang ligal nga mga demokratikong partido, organisasyong masa kag alyansa sang mga mamumugon, mangunguma, pamatan-ong estudyante, propesyunal kag iban pa nga demokratikong sahi kag sektor.

Ginatus-gatos na nga biktima, nga lunsay wala sang armas kag wala inugbato, ang brutal nga ginasalakay kag ginapatay sang mga death squad nga kontrolado sang mataas nga kumand kag mga yunit paniktik sang AFP kag PNP.

Ang pagpatay kay Sotero Llamas sa pihak sang lapnagon nga pagkundenar sang demokratikong upinyon publiko sa sulod kag guwa sang pungsod ang pinakaulihi nga pruweba sang lubos nga wala pagkunsiderar sa mga basehang makatawo kag sibilisado, labaw nga arogansya kag pag-abuso sa gahum, kag binuang nga pagkauhaw sa dugo sang

mga lisensyado nga manugpatay-tawo sang estado kag sang nagahari nga rehimeng Arroyo nga nagamando kag nagakontrol sa ila.

Nagapanindugan ang rebolusyonaryong hublag sa kriminal nga salabton sang pasista kag papet nga rehimeng Arroyo bilang utok, tagaplano kag tagamando sang malaot nga pag-atake sa mga wala armas nga pangontra sa pulitika. Sa sugo kag basbas ni Gloria Macapagal-Arroyo, ang nagakatabo nga pagbaha sang dugo ginplano, inorganisa kag ginadiriher sang national security cluster sang kabinete sa pagpamuno ni anay Gen. Eduardo Ermita kag ginalakipan sang mga panatiko nga anti-komunistang sanday Norberto Gonzales, Raul Gonzales, Avelino Cruz, Gen. Generoso Senga sang AFP kag Gen. Arturo Lomibao sang PNP.



***Mga tampok
sa isyu nga ini...***

**Mahigko nga gera sg
rehimeng US-Arroyo**
PAHINA 3

**Kulang nga mga hulot-
klasehan, gagmay nga
badyet**
PAHINA 9

**3 riple naagaw,
5 sundalo napatay sa
Kalinga**
PAHINA 13

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa panugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com